

HEADLINES (MORNING)

1. Sorkar laipui ruahmanin vawiin hian rampumah kum 1975-a Emergency puan avanga tawrhna nasa thleng duhlohna ni Samvidhaan Hatya Diwas hman a ni ang.
2. Excise Dept chuan Mizoramah ruihhlo a hluar chhan ber chu state thenawma Golden Triangle atanga Mizorama awlsam taka ruihhlo a luh vang a ni a ti.
3. Directorate of Civil Aviation chuan ram chhunga airport hrang hrang endikna an kalpui mekah airport tam takin an mamawh ang an nei lo tih an hmuchhuak.
4. India chuan Iran leh Israel ten inkahhai an puan chu a thlawp tih a sawi.

<><><>

SAMVIDHAAN HATYA DIWAS

Sorkar laipui ruahmanin vawiin hian rampumah India ram danpui, Constitution palzut ni champhaphak Samvidhaan Hatya Diwas hman a ni ang. Sorkar laipui chuan nikum khan June ni 25 chu Samvidhan Hatya Diwas atana hman turin a puang a. He ni hi kum 1975, June ni 25 a India ram sorkarin Emergency a puan hriatrengna atana tih a ni a. Kum 1975 Emergency puan laia nunna chan leh mi tam tak tuarna hriatpuina niah hman a ni.

Akashvani News in Advocate Er. Hriata Chhangte, Social Activist a kawmnaah kum 1975-a India sorkarin Emergency a puan ang chu thleng tawh lo se a duh thu leh a ni hriatrengna Samvidhaan Hatya Diwas chu India ram democracy hrisel tak leh tha taka a kal zel na tura hman a nih a beisei tlat tih a sawi.

Pu Hriata Chhangte chuan kum 1975 June Ni 25-a India Prime Minister Pi Indira Gandhi in Emergency a puan chhan ber chu Prime Minister ni lai, Prime Minister ni leh tura a inbuatsaih meka ram dinhmun thlira a inrintawh tawh loh vang leh Allahabad High Court in inthlanna a hmachhawn dan fel tawh lo anga an khinna a pawm vang a nih thu a sawi a. Ram a la hruai theihna awmchhun chu Article 352 hmanga Emergency puan a nih thu leh Emergency a puan hnuah a nemngheh nan Maintenance of Internal Security Act, 1971 (MISA) a hman thu a sawi a ni.

MISA hmang hian chhan mumal tak awmlain ramchhungah phuahchawp deuhin mi nuai tel an man khawm a. Mizoramah pawh a lar zualah chuan Brig. T. Sailo, Pu R. Vanlawma leh midang mi 10 chuang hret an man nia a lan thu sawiin, hetih hunlai hian Pi Indira Gandhi rawn vung chhoh laiin India ramah Congress party chu ‘Indira is India, India is Indira’ tiin fawr lutukin an kal thin a. Tuna BJP leh a thawhpui tam ber te hi khatihlai pawha Emergency dotu an nih thu leh India ram democracy lungthu pathum - executive, Legislature leh Judiciary te a nih tur ang a ni loa an hmuh avanga do an ni a ti.

Pu Hriata Chhangte chuan Samvidhaan Hatya Diwas chu politics anga ngaih theih a ni nain mimal duh thu avang leh inthlana chetchhiat dawn avanga Emergency puan ang kha a thlen tawh lohna tura hman a ni a ti a. India ram ropui tak, thang mek, ram changkang leh intodelh, developed country ni chho tura a kal zel theihna tur leh democracy tha leh hrisel taka a awm zel theihna turin Samvidhan Hatya Diwas chu hman ni se a duh a sawi a ni.

<><><>

CHILD RIGHTS COMMISSION

Mizoram State Commission for Protection of Child Rights Chairperson Pu Jimmy Laltnanmawia’n tunhnaia naupang khawih chhetu Lalrampana leh midang hetiang a inhnawnawih ten an phu tawh hremna hmu ngei se an duh tih a sawi.

MSCPCR Chairperson chuan tunhnaia naupang kumtlinglo khawihchhiaa, midang hmuh theih tura hursualna video bawlhhlawh siam nana naupang inhnawnawih tir tu leh pholangtu Lalrampana chu CBI ten tun thla ni 9 khan an rawn man thu leh he thilthleng hi Commission chuan pawh an ti takzet tih a sawi a. POCSO Act chuan naupang laka hursualna leh zahmawh rawngkai lanna video leh thlalak reng

reng, mimal kawlhthat tur a ni emaw, midang hmuha pho lan tur a ni emaw a khap tlat tih sawiin Dan bawhchhetu chu kum-5 aia tlem lo Lung-In tan tir leh sum chawitir thlengin a huam thu leh, a tisual nawn tu chu kum-7 thleng tang tura hrem theih a nih thu a sawi bawk a ni.

MSCPCR hotute chuan tunah hian POCSO Act hnuaiah Mizoram chhunga district court hrang hrangah case kal lai 194 a awm mek thu an sawi a ni.

<><><>

MUHCS

Mizoram Universal HealthCare Scheme (MUHCS) zawmtu damdawiin ten chat lak lova sum an hmuh theih nan Finance Department in sum a pechhuak hma thin dawn.

Sorkar thuchhuah tarlan danin, Finance Department Office Memorandum in a chhuah a. Thla thum – sorkar Quarter khat ral hma in Mizoram State Health Care Society in sum hmanral tur a chhut zat ang a sanction thin dawn a ni.

Kan corr thudawn danin, tun dinhmunah Mizoram chhunga Private damdawiin za zela 40.62 in Mizoram Universal Health Care Scheme hi an zawm tawh a. MUHCS hotute sawi danin vawiin thleng khan Mizoram chhunga Private damdawiin 13 ten Mizoram Universal Health Care Scheme an zawm tawh a, hei hi za zela 40.62 niin a bak private damdawiin dang nen hian inbiakna kalpui mek a ni.

MUHCS hotute chuan Private damdawiin thenkhat scheme la zawm lo te chu mipuiten harsatna an tawh mek hrethiam a, MUHCS hnuaia mipui tana inziak lut turin an ngen a, tun dinhmunah Mizoram chhunga damdawiin 13 ah MUHCS hman theih niin Aizawl ah 6, Lunglei, Champhai leh Lawngtlai ah 2 theuh bakah Siaha ah pakhat inziak lut an awm a ni.

<><><>

NASHA MUKHT BHARAT

Excise Commissioner Pu Z. Lalhmangaiha chuan Mizoramah ruihhlo a hluar chhan ber chu state thenawma Golden Triangle atanga Mizorama awlsam taka ruihhlo a luh vang a ni a ti.

Akashvani News in a kawmnaah he thu hi sawiin Excise Commissioner chuan golden triangle chu nikumah pawh khawvela heroin tharchhuak hnem ber an nih thu a sawi a. Chumi atang chuan khawvel hmun hrang hrangah putdarh a ni a ti a. Mizoram chu Myanmar nena ramri km 510 nei a nih avangin khawi hmunah pawh, sakawr leh bawng hmang tein an rawn lut thei si a, hei hi Mizoram harsatna ber a ni a ti.

A do dan kawngah chi hrang hrangin theihtawp chhuah a nih thu a sawi a, Kohhran, sorkar leh NGO te pawhin theihtawp an chhuah a. An ni chauhin an do hneh theih loh avangin mipuite tanrual a ngaih thu a sawi a ni. Tih tak zeta ruihhlo chu mipui, a te ber atanga a lian ber te'n an do a ngaih thu a sawi a. Ruihhlo do kawngah tha thlah a nih chuan Mizoram dinhmun a thim hle dawn a ni a ti.

Excise & Narcotics department chuan kuminah May ni 31 thleng khan heroin kg 16 leh gram 171 bakah zu leh ruihna chi hrang hrang man a ni tawh a. ND&PS Act, 1985 hnuaiah mi 409 man a nih tawh thu leh case 214 ziahluh a ni tawh a. MLP Act 2019 hnuaiah mi 2,422 man a ni a, case 2,715 ziahluh a ni tawh bawk.

Hetihlai hian, sorkar hmalaknaa Ruihhlo ngai leh awmna hmun neilote lo enkawl lailawkna Hulhliap (short stay) chu nimin atang khan kalpui tan a ni a, mi 200 admit an ni.

Hulhliap Short Stay hi nimin khan Batch khatna bultan niin mi 150 admit tum an nih laiin mamawhna avangin mi 200 chuang admit an ni a, Social Welfare Minister Pi Lalrinpuii chuan Kohhran leh Tlawmngai pawl te chungah lawmthu sawiin Hulhliap Short Stay Centre chuan ruihhlo Bawih a tang mek te tan nunthar an neih theihna hmun anih ngei theihna turin tawngtaina lamah hriatzui a pawimawh a ti a, a hlawhtlin ngei theihna turin tan la tlang zel turin kalkhawm te a sawm bawk a ni.

Minister sawi danin he hmunah hian ni 10 chhung detoxing an ti ang a, ni 5 chhung Psychological counselling an neihpui ang. Ni 5 dang Synod revival camping center-ah an lut ang a, chumi zawhah chuan mahni in lama haw duhte chu hawn tir an nih dawn bakah Centre a awm duhte chu an awm zuina tur ngaihtuah sak an ni dawn a ni.

<><><>

SIALHAWK PINEAPPLE

Khawzawl District chhunga awm Sialhawk khua chuan nikum aiin kuminah hian Lakhuihthei thar tam an inbeisei.

Sialhawk Lakhuihthei Society Secy Pu Kawllianpuia hnen atanga thu dawn danin, Sialhawk khuaah hian chhungkaw 250 velin Lakhuihthei an ching a. Nikum khan Lakhuihthei Quintal 9000 vel an thar a, kuminah hi chuan Lakhuihthei hi Quintal 12,000 vel thar chhuah theih an inbeisei a. Kumin bikah hian Quintal 200 vel an seng tawh a, a seng runpui hi July thla tawp lam atangin August thla laihawl vel thleng an nei thin a ni.

Lakhuihthei hralh chungchangah hian kumtin harsatna nei thin mahse kuminah chuan Clover Organic Company leh Tuichangral FPC hmalaknain Guwahati a Aromatic Company nen an indawr a, Aromatic Company hian an Lakhuihthei thar chhuah te an leisak tawh dawn avangin harsatna an tawh an ring lo tih an sawi a, kumina an thar chhuah ang te pawh an thawn thla zel tawh a ni. Sialhawk khawtlang hian kum 2015 vel atang khan khawtlang huapin Lakhuihthei hi an ching tan a, tuna Lakhuihthei ching chhungkaw 250 zingah hian chhungkaw 100 chuangin Lakhuihthei chin hi ei bel berah an hman a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

DGCA AIRPORT INSPECTION :

Directorate of Civil Aviation chuan India ram chhunga airport hrang hrang endikna an kalpui mekah airport tam takin an mamawh ang an nei lo tih an hmuchhuak.

Civil Aviation lamin airport thenkhat an endikna hi ngawrh taka kalpui niin India ram chhung khawpui lian zawk a airport-te endik a ni nual a, zing kar leh zan lama thlawhna tum leh thlawk chhuak ten harsatna an nei em tih bakah , flight operation leh air traffic control-te pawh endik a ni bawk. Endikna kalpui a nih hian India ram khawpui lian Delhi leh Mumbai a airport thenkhat chuan duh thu a sam lo hle tih tarchhuah a ni a, heng te hi siam that a nih vat theihna atan thuneitu sang zawkah thlen a nih tawh thu tarlan a ni bawk.

<><><>

INDIA SUPPORTS CEASEFIRE :

India chuan Iran leh Israel ten inkahhai an puang chu a thlawp thu a tarlang. Sorkar laipui a Ministry of External Affairs thuchhuahin a tarlan danin Iran leh Israel-ten inkahhai an puan bakah United States leh Qatar ram in hemi atana theihtawp an chhuah chu India ram chuan a thlawp takzet thu tarlan a ni a, Ministry thuchhuak hian India ram chuan heng ram pahnihte inkara remna tluantling a awm theihna turin theihtawpa a tha a thawh ve tur thu te bakah boruak tha zawk ram pahnih ten an neih chhoh zel a duh takmeuh thu te tarlan a ni bawk.

<><><>